

Ա. Ա. ՊԵՏՐՈՍՅԱՆ

ԽՈՓԱԼԱՔՆԵՐԸ ՀԱՅ-ՎՐԱՑԱԿԱՆ ՏՆՏԵՍԱԿԱՆ-ՔԱՂԱՔԱԿԱՆ
ՀԱՐԱՐԵՐՈՒԹՅՈՒՆՆԵՐՈՒՄ

Հայ և վրաց ժողովուրդների պատմական կապերը իրենց ծնունդն են առնում դեռևս հնագույն առասպելական ժամանակներից: Լինելով դրկից երկրներ և հանդիսանալով թատերաբեմ Արևելքի և Արևմուտքի պետությունների, բարբարոս ցեղերի մշտական մենամարտերի, այդ երկրների ժողովուրդները շատ տխուր և ուրախ օրեր են տեսել, համատեղ պայքար մղել հայրենի երկրի աղատության համար, ճաշակել պարտության դուռը բաժակը և հաղթանակի ոգեշունչ զգացումը: Եվ երբ զավթիչ ասպատակների հարվածների տակ հայ ժողովուրդն ստիպված է եղել տարագրվել օտար երկրներ, հարևան Վրաստանը հանդիսացել է այն վայրերից մեկը, ուր հանգրվանել են թշնամու սրից փրկված հայ գաղթականների առավել ստվար զանգվածներ:

Սակայն նրանք պարտք չեն մնացել այն երկրին, որը նրանց հյուրընկալել էր, այլ մեծապես նպաստել են ինչպես նրա տնտեսական ու մշակութային կյանքի զարգացմանը, այնպես էլ ռազմունակությանը:

Հաստատվելով Վրաստանի քաղաքներում, հայերը սկսում են առաջատար դեր կատարել երկրի առևտրա-արդյունաբերական կյանքում, կազմում են, այսպես կոչված, մոքալաքների դասը: Քաղաքի բնակիչը վրացերեն կոչվում է մոքալաքե (მოქალაქე), որը հայերեն թարգմանվում է քաղաքացի: Սկզբում մոքալաքե էին կոչվում քաղաքներում ապրող բոլոր բնակիչները, բայց այնուհետև «մոքալաքե»-ն դառնում է մի տեսակ պատվանուն, որ տրվում էր վրաց թագավորների կողմից Թբիլիսի և Դոնի քաղաքների այն բնակիչներին, որոնք ունեին քաղաքացիական հին ծագում և վճարում էին հատուկ հարկ (մախթա): Այսպիսով, Թբիլիսիի և Դոնի քաղաքային բնակչության մեջ առաջ է գալիս մի նոր շերտ, օժտված որոշ արտոնություններով, որի իրավունքներն արդեն արտահայտություն են գտնում Վախթանգ VI թագավորի կազմած օրենսգրքում: Մինչև XIX դարի սկզբները մոքալաքները առավելապես հայերն էին:

Հայ պատմագրության մեջ մոքալաքների մասին խոսել են Լեոն¹, Ա. Երիցյանը², Դ. Անանունը³: Սրանք այս հարցին անդրադարձել են այնքանով, որքանով որ հարկ է եղել՝ առնչված իրենց ընտրած թեմայի ու պատմական ժամանակաշրջանի հետ: Այսպես, Լեոն պատմում է մոքալաքների մասին «Թիֆլիսի հայ գաղութը» բաժնում (նշված աշխատությունը), Երիցյանը՝ երբ խոսում է Թիֆլիսահայերի, իսկ Անանունը՝ Վրաստանի հայերի մասին: Անց-

¹ Լ Ե Ո, Հայոց պատմության նորագույն շրջան, դասախոսություններ կարդացված համալսարանում, Երևան, 1924—1925 թթ. (ձեռագիր):

² Ա. Երիցյան, Ամենայն հայոց կաթողիկոսությունը և Կովկասի հայք XIX դարում, I մաս, Թիֆլիսի հայք և նոցա վիճակագրությունը:

³ Դ. Անանուն, Ռուսահայերի հասարակական զարգացումը XIX դարում, I մաս:

յալի պատմաբանները տալիս են լուրջ մոքալաքների պատմությունը (քանի որ նրանք հայեր էին): Ինչ վերաբերում է ժամանակակից հայ պատմաբաններին, ապա նրանցից ոչ մեկը չի անդրադարձել այս խնդրին: Մինչդեռ ներկայիս վրացի պատմաբանները բավականին մեծ ուղադրություն են դարձնում մոքալաքների հարցի վրա, առանձին ուսումնասիրություններով լուսաբանում այն: Պատմաբաններ Շ. Մեսխիան⁴, Թ. Բերիաշվիլին⁵, Շ. Կակուրիան⁶, Մ. Սամսոնաձեն⁷, տնտեսագետ Վ. Չանտլաձեն⁸ իրենց աշխատություններում հանգամանորեն մեկնաբանում են մոքալաքների առաջացումը, նրանց քաղաքային կյանքում առաջնակարգ դերը, իսկ Թ. Բերիաշվիլին Թբիլիսիի բրնակության գերիշխող խավի՝ մոքալաքների սոցիալ-տնտեսական վիճակի ուսումնասիրման հիմունքները, լուսաբանում է ֆեոդալական հարաբերությունների քայքայման, կապիտալիստական արտադրանքի առաջացման, բուրժուական խավի կազմավորման պրոցեսը: Սակայն հեղինակը չի նշում, թե ովքեր էին մոքալաքները իրենց ծագումով, ինչու էին հենց նրանց զանազան արտոնություններով օժտում վրաց թագավորները: Բերիաշվիլին, ինչպես և Մեսխիան բերում են բազմաթիվ փաստաթղթեր մոքալաքների ու նրանց գործունեության մասին, բայց չեն նշում նրանց ազգային կազմը: Մինչդեռ հայտնի է, որ դրանք հայեր էին:

Մոքալաքների՝ որպես քաղաքային բնակչության առանձին խավի հանդեպ գալը պատահական երևույթ չէր: Այն պայմանավորված էր Վրաստանի սոցիալ-տնտեսական և քաղաքական դրությամբ, վրաց թագավորների XVII—XVIII դարերում վարած քաղաքականությամբ:

Այդ ժամանակ Վրաստանը ճորտատիրական երկիր էր, որը պահպանել էր իր թագավորությունը, բայց ոչ անկախությունը: Վրաց թագավորը Իրանի շահի հպատակն էր, նրա վալին: Այսպես էր մինչև XVIII դարի երկրորդ կեսը, երբ Վրաստանի թագավոր Հերակլ II-ը, օգտվելով Նադիր շահի մահից հետո Իրանում ստեղծված խառը դրությունից, Վրաստանը անկախ դարձրեց: Դուրս գալով, Հերակլ II-ը իր հոր՝ Թեյմուրազ II-ի մահից հետո (1762 թ.) միավորեց Քարթլիի և Կախեթիայի թագավորությունները:

Գոյություն ունեցող ֆեոդալական կարգերի պայմաններում բավականին ուժեղ էին առանձին ֆեոդալների կենտրոնախույս, անջատվողական տենդենցները: Վրաց թագավորները, իրենց ազդեցությունը ուժեղացնելու համար աշխատում էին ստեղծել տնտեսական և քաղաքական հենարան: Այդ կարևոր հենարաններից մեկը քաղաքային բնակչությունն էր: Պատմական հանգամանքների բերումով, քաղաքային բնակչության զգալի մասը հանդիսանում էին, ինչպես արդեն նշեցինք, հայերը:

⁴ Ш. Месхиа, Города и городской строй Грузии XVII—XVIII вв., Тбилиси, 1959.

⁵ Թ. Բերիաշվիլի, Դեմոկրատական հասարակական կառուցման սոցիալական պայմանները (ժողովրդագրություն). Թբիլիսի, 1964 թ.

⁶ Ш. Какурия, Население Тбилиси (1803—1959 гг.). Автореферат, Тбилиси, 1965.

⁷ Մ. Սամսոնաձե, Թբիլիսիի սամբուլայի զանգվածային XIX դարի հայերի և ռուսների հարաբերությունները, Թբիլիսի, 1964 թ.

⁸ В. Чантладзе, Финансы и дореформенной Вост. Грузии (1801—1864), Тбилиси, 1956.

Դեռևս V դ. Վախթանգ Գորգասարվրաց թագավորը Թիֆլիսը, որը դարձրել էր իր մայրաքաղաքը, բնակեցնում է հայերով: Դավիթ Շինարարը XII դարում կառուցում է Դորի քաղաքը՝ բազում վանքերով և եկեղեցիներով⁹ հատկապես հայ գաղթականների համար: Ռոստոմ թագավորը 1650 թ. Բայանդուր հայ իշխանին է հանձնում «իշխանությունը մեծ Տփլիս քաղաքին»¹⁰, իսկ 1714 թ. թագավորական հրովարտակով իշխան Բեհբուջյանը ստանում է Թիֆլիսի մելիքի պաշտոնը, որը այնուհետև ժառանգական է դառնում այդ տոհմի համար¹¹: Իսկ երբ զանազան արհավիրքների (ժանտախտ, լեղզիների և պարսիկների բարբարոս ներխուժումներ) պատճառով պակասում էր Թիֆլիսի կամ, ընդհանրապես, Վրաստանի բնակչությունը, վրաց թագավորները աշխատում էին պակասը լրացնել հայերով, երբեմն բռնի, երբեմն՝ հրավերով: Այդպես էր Հերակլ II-ը, որը պարսիկների դեմ իր մի քանի արշավանքների ժամանակ մեծ թվով հայեր է բերում և բնակեցնում իր երկրում ու մայրաքաղաքում, կամ էլ Թիֆլիս էր հրավիրում Հայաստանի ու Պարսկաստանի հայ խոշոր վաճառականներին, շնորհելով նրանց զանազան արտոնություններ: Թարխան Աղամալովը Վրաստան էր եկել Հերակլի հրավերով և իր հարստության շնորհիվ իսկույն մեծ դիրք էր գրավել նրա արքունիքում¹²: Իսկ երբ նա լքեց Վրաստանը և բնակություն հաստատեց Աստրախանում՝ Հերակլ II-ը դիվանագիտական երկար գրադրություն սկսեց ռուսական արքունիքի հետ, փորձելով ինչ գնով լինի ետ վերադարձնել հայ մեծահարուստին: Այդ կապակցությամբ Հերակլը դիմեց նաև Սիմեոն կաթողիկոսի հեղինակավոր միջնորդությանը: Բայց նրա բոլոր ճիգերն ապարդյուն անցան: Այս օրինակը ցույց է տալիս, թե որքան մեծ նշանակություն էին տալիս վրաց արքաները առևտրական դասին, որին նրանք ուզում էին հենարան դարձնել ոչ միայն խոշոր ֆեոդալների կենտրոնախույս ձգտումները ի չիք դարձնելու, այլև երկրի տնտեսական զարգացումը առաջ մղելու գործում: Իսկ Վրաստանում տիրող ֆեոդալական համապարփակ հասարակարգի պայմաններում ֆեոդալական կապանքներից ազատ մոքայաքների դասն էր ի վիճակի ուժ հաղորդելու վրաց թագավորների այդ ձգտումներին:

[illegible]

⁹ Պատմութիւն Մատթէոսի Ուռհայեցոյ, Երուսաղեմ, 1869, էջ 47—48:

¹⁰ Զաքարեայ Սարկաւազի պատմութիւն, հ. 2, Վաղարշապատ, 1870, էջ 98.

11 Ա. Երիցյան, Թիֆլիսի հայք եւ նոցա վիճակագրութիւնը, «Փորձ», 1879:

12 Վ. Դ ի լ ո յ ա ն, էջեր Ռուսաստանի հայ վաճառականական կապիտալի պատմությունից.

¹⁰ Պատմա-քանասիրական հանդես, № 4, 1962, էջ 74:

¹² თ. ბერიაშვილი, რეფორმამდელი ხანის საქართველოს ქალაქების სოციალური შენები, თბილისი, 1964 წ., ლვ 30.

ժառանգ. ყველა ესეი იყვინო „სახასო კომლი ქალაქის დავთრისა, რომელნიც აქაურნი არიან და აძლევენ 4000 მან. მახთას საკუთრად“).

Մոքալաք անունն էին կրում նույնպես թագավորի երաժիշտները—Շավթուխով և Դավիթ Հախվերզով, դրոշակակիրը—Զալուս-Բաբանուսով, փողհարը, դպիր Մանանովը և ուրիշներ, որոնք ապատված էին պետական հարկերից և թագավորից ուճիկ էին ստանում: Որ վրաց թագավորները մեծ տեղ էին տալիս մոքալաքներին իրենց կառավարության մեջ, ցույց են տալիս և հետևյալ փաստերը: Վախթանգ VI մոտ նազիրի պաշտոնը վարում էր մոքալաք Հովսեփ Փիթոյանը (Զուրարյանը): Երբ 1760 թ. Թեյմուրազ թագավորը գնում էր Ռուսաստան, նրա շքախմբում կային երեք մոքալաքներ՝ խոշոր վաճառականներ Գևորգի Բաղդադովը, Նազար Եգորովը և Մելքոն Դավիդովը (купец и кредитор)¹⁴:

Հերակլ II հանձնարարությամբ մոքալաք Ամիրովը կատարում էր զանազան կարգի դիվանագիտական հանձնարարություններ: (Ընդհանրապես, Հերակլի արքունիքում պաշտոնները մեծ մասամբ վարում էին հայերը: Այսպես՝ դիվաններ (քարտուղար) էին լինում Թումանյանները, թարգմանիչներ՝ Ենիկուլովյանները, զառնչանջիներ՝ (երկաթյա և պողպատյա զրահների վրա ոսկեգիր քանդակող կամ դրվագներ գրող) Բերուլյանները, մելիքները և մինիշկարբաշիներ՝ Բեհրուլյանները, արքունիքի ախոռապետներ՝ Ղորղանյանները և այլն): Իսկ Գևորգի XII թագավորը ավելի հեռուն գնաց: Երբ նրա հրամանով թագածառանգներ Ալեքսանդրից, Յուլիոնից և Փառնառզից խլվեցին նրանց ինչքն ու կայքը, ապա նրանց պատկանող որոշ գյուղացիներ դասվեցին պետական քաղաքացիների շարքը և ընդգրկվեցին մախթա վճարողների թվի մեջ, այն նպատակով, որպեսզի ավելացվի մոքալաքների թիվը, որը 1795 թ. Աղա Մահմեդ խանի կողմից Թիֆլիսի ավերումից և գերեվարությունից հետո խիստ պակասել էր¹⁵: Բացի այդ, նույն վրաց թագավորների մտքած իրավական նորմերի համաձայն, եթե պետական գյուղացին տեղափոխվում էր Թիֆլիս, կամ մեկ ուրիշը գալիս էր արտասահմանից ու մտնում պետական ծառայության մեջ և ցանկություն հայտնում զառնալու մոքալաք, կարող էր գրանցվել նրանց ցուցակի մեջ և համարվել մոքալաք¹⁶:

Մոքալաքների իրավունքների մասին կարգում ենք Վախթանգ VI թագավորի կազմած օրենսգրքում: 30, 31, 32, 33 հոդվածները սահմանում են, որ II կարգի ազնվականի արյան զնի չափով որոշվում է հարուստ վաճառականին—մոքալաքին, իսկ III կարգի ազնվականի արյան համար վճարում են 480 ուր., նույնքան և II կարգի վաճառականի արյան համար¹⁷: Ուրեմն, մոքալաքները, ինչպես և ազնվականները՝ Վրաստանում բաժանված էին կարգերի՝ առաջին, երկրորդ, երրորդ կարգի և այլ կարգի մոքալաքներ, որոնք իրենց իրավունքների մեջ, ինչպես ցույց է տալիս օրենսգրքը, հավասարեցված էին ազնվականներին: Առաջին կարգի մոքալաքի սպանության դեպքում նրա արյունը գնահատվում էր երկրորդ կարգի ազնվականի արյան զնի չափով, երկրորդ կարգի մոքալաքին՝ երրորդ կարգի ազնվականի արյան զնով և այլն:

Մոքալաքների կարգը որոշվում էր ընտանիքի, տոհմի հնությունից, անշարժ կալքի և կապիտալի մեծությամբ: Եթե մոքալաքներից որևէ մեկը ինչ-ինչ

¹⁴ Архив внешней политики России, ф. «Гл. арх. 2—8», д. 8, л. 15.

¹⁵ Акты Кавказской археографической комиссии, т. VI, ч. I, стр. 11.

¹⁶ Там же, т. XI, стр. 685.

¹⁷ Сборник законов Грузинского царя Вахтанга VI. Тифлис, 1827.

պատճառներով զրկվում էր իր ունեցվածքից, նման դեպքում նա չէր կորցնում իր կոչումը, այլ, օրինակի համար, 1-ին կարգից կարող էր անցնել 2-րդ կարգ, 2-ից՝ 3-րդ և այլն: Մոքալաքի մահից հետո նրա որդին և թոռը, մինչև չափահաս դառնալը, կրում էին ընտանեկան պատվանունը: Բայց եթե մոքալաքը դժբախտություն էր ունենում հեռացվելու մոքալաքների մատյանից, ապա նա զրկվում էր մոքալաք պատվանունից¹⁸: Մոքալաքները իրավունք ունեին գնել գյուղացիներ և դառնալ ճորտատեր: Եթե մոքալաքը կատարեր սպանություն, ապա այդ հանցանքի համար նա մահապատժի չէր ենթարկվում: Մոքալաքները ազատված էին մի ահավոր տուրքից՝ արբաբից: Վրաստանը Պարսկաստանի տիրակալության դաժան ժամանակներում հարկադրված էր տարեկան հարկ տալ պարսից շահերին՝ տղաներով և աղջիկներով: Մոքալաքները ազատվում էին այդ ծանրությունից՝ փոխարենը վճարելով փրկագին:

Չնայած որ մոքալաքները վարում էին պետական պաշտոններ, զբաղվում արհեստներով, այնուամենայնիվ նրանց հիմնական զբաղմունքը մնում էր առևտուրը, որը և հնարավորություն էր տալիս նրանց դառնալու հարուստ գրամատերեր:

Մոքալաքները, բացի իրենց շնորհված արտոնություններից և իրավունքներից, ունեին նաև պարտականություններ թագավորի հանդեպ: Նրանք պարտավոր էին վճարել իրենց հատուկ հարկը՝ մախթան, տարեկան 4000 ուրլի: Հերակլ II քարտուղարի (դիվանի) կազմած ցուցակից երևում է, որ XVIII դ. վերջին 4000 ո. մախթա վճարել են 556 տուն մոքալաքներ¹⁹:

Մոքալաքները վճարում էին և մալի, որը հավաքվում էր ընդհանրապես Թիֆլիսի բոլոր բնակիչներից, ամուսնացած տղամարդուց 1 ո. 20 կ., իսկ ամուրիից՝ 60 կուպ., մասրապ հարկ, որը վճարում էին ընդհանրապես քաղաքների բնակիչները²⁰: Բացի այս բոլորից, թագավորը գրամի խիստ կարիքի դեպքում գրամաժողով էր անցկացնում մոքալաքների մեջ:

Մոքալաքները, համբարների նման, միավորված էին մի միության մեջ (ОБЩЕСТВО), որը գործում էր որոշ սկզբունքներով.

1. Մոքալաքները ունեին իրենց միջից ընտրված գատավորներ, որոնք վճռում էին քաղաքացիական վեճերը իրենց դասի անդամների միջև: Այդպիսի գատաստանական ինքնավարություն գոյություն ուներ և յուրաքանչյուր համբարության մեջ:

2. Համբարների վրա հարկերն ու տուրքերը բաժանելու և հավաքելու համար, յուրաքանչյուր տարի քվեարկությամբ ընտրվում էին երեք մոքալաքներ, ընտրվում էին նաև 5—12 հոգի, որոնք պետք է ստուգեին և հաստատեին բաշխման կարգը, ըստ որի կատարվում էր հարկահավաքը²¹:

3. Նացվալների (полницмейстер) միջոցով սակագին էին նշանակում կենսամթերքների վրա²²: Հարկահավաք մոքալաքները գործում էին համբարությունների գլխավորների՝ «ուստաբաշիների» հետ: Այս բոլորին կառավարում էր մելիքը, որի իրավասությանն էր ենթարկվում ոչ միայն Թիֆլիսը, այլև նրա շրջակայքը:

¹⁸ Там же, т. XI, стр. 685.

¹⁹ Там же, т. VI, ч. 1, стр. 9.

²⁰ Там же, стр. 13.

²¹ Там же, стр. 11.

²² Ю. Ф. Ахвердов, Тифлисские амкары, Тифлис, 1883, стр. 10.

Բավական մեծ իշխանություն և պարտականություններ ուներ մեկիքը՝ առևտուրը պահել բարեկարգ վիճակում, հետևել շափի ու կշռի ճշտությանը, առևտրի արդարությանը՝ առանց խաբելու և կեղծելու: Մեկիքը պետք է հետևեր այն բանին, որպեսզի առևտրականները բավարարվեն շափավոր հասույթով, վեճեր չբանային և չվիրավորեին միմյանց: Երբ վաճառականների և քաղաքացիների միջև առաջանում էին կալվածքային կամ ժառանգական դատավեճեր, առևտրական հաշիվներ, մուրհակային հարցեր և այլ քաղաքացիական գործեր, մեկիքը հրավիրում էր անվանի վաճառականներին, հարցերը լուծում էր գրավոր դատավճռով, որը հաստատում էր իր և դատաքննությանը մասնակցողների կնիքով: Պակաս կարևորություն ունեցող գործերի քննությունն ու վճիռը մեկիքը կարող էր հանձնարարել երկու կամ ավելի պատվավոր քաղաքացիների, որոնք վայելում էին համրնդհանուր հարգանք»²³:

Մեծ արտոնություններ ուներ մեկիքը վրաց թագավորների ժամանակ: Օրինակ. Վրաստանում անշարժ կալվածքների վաճառման և գնման թղթերը ու կալվածագրերը վավերացված էին համարվում, երբ նրանց վրա դրվում էր թագավորի կնիքը: Բացառություն կազմում էին միայն Թիֆլիսի անշարժ կալվածքները, որոնց վաճառման և գնման թղթերի վավերականության համար բավական չէր միայն թագավորի կնիքը, այլ պետք է լիներ նաև հայ մեկիքի կնիքը: Այս արտոնությունը հասկանալի է, գրում է Լեոն, քանի որ Թիֆլիսի անշարժ կալվածքները գլխավորապես հայերին էին պատկանում: Այս փաստը դալիս է ապացուցելու նաև, որ մեկիքն իր իշխանությամբ մարմնացնում էր Վրաստանի մայրաքաղաքի հայության ինքնավարության սկզբունքները²⁴:

Մեկիքի պաշտոնը ժառանգական էր, որ վարում էին Բեհբության տոհմի ներկայացուցիչները սկսած 1714 թ. մինչև Վրաստանի Ռուսաստանին միանալը, երբ մեկիքի պաշտոնը նույնացվեց ոստիկանապետի պաշտոնի հետ: Սակայն Ռուսաստանին միանալուց հետո էլ Բեհբությանները վայելում էին նույն իշխանությունն ու արտոնությունները:

Մեկիքի պաշտոնի կողքին մենք գտնում ենք նաև մամասախլիսի (տանուտեր) պաշտոնը, որի գործունեության շրջանակները, սակայն, այնքան էլ պարզ չեն: Ս. Եղիազարովը գտնում է, որ մամասախլիսը նույն մեկիքն է, մեկիք բառի վրացական տառադարձումը: Սակայն եթե մենք նույնիսկ ընդունելու լինենք նման բացատրությունը, ապա անհասկանալի է դառնում այդ երկու տիտղոսների միաժամանակյա գործածությունը: Այնուհետև, ինչպես հայտնի է, XVIII դ. մամասախլիսի պաշտոնը միացվեց մեկիքի պաշտոնին և երկուսն էլ հանձնարարվեց Բեհբությաններին: Հետևաբար, պետք է ենթադրել, որ դրանք տարբեր պաշտոններ էին:

Մեր կարծիքով, մամասախլիսի իրավասության տակ Վրաստանի հայության ավելի լայն շրջանակներ էին մտնում, քան մեկիքի, որը ինչպես նշել ենք, իրավասու էր Թիֆլիսի վրա:

Բացի պետական մոքալաքներից, կային մոքալաքներ, որոնք պատկանում էին եկեղեցուն: Ինչպես վրաց թագավորների օրոք, այնպես էլ ռուսական տիրապետության ժամանակ, եկեղեցական մոքալաքները զբաղվում էին առևտրով, օգտվում էին նույն այն իրավունքներից, ինչ պետական մոքալաք-

²³ В. Е. Романовский. Очерки из истории Грузии. Тифлис. 1902, стр. 415.

²⁴ Լեոն, Հայ ժողովրդի պատմության նորագույն շրջան, I մաս (դասախոսություններ) ձեռագրի իրավունքով, Երևան, 1926—28, էջ 173.

ները: Նրանք աղատ էին յուրովի տնօրինելու իրենց ինչպես ժառանգական, այնպես էլ օրինավոր կերպով ձեռք բերված (գնված, նվիրած) սեփականությունը: Այս մոքալաքների կախվածությունը եկեղեցուց արտահայտվում էր այն բանով, որ նրանք պարտավոր էին որոշ հարկ տալ եկեղեցուն՝ մոմով և դրամով: Միևնույն ժամանակ և նրանք հարկ էին տալիս պետությանը, ինչպես պետական մոքալաքները²⁵:

* * *

Վրաստանում ռուսական կառավարության հաստատումը տարբեր հասարակական խավերի մեջ տարբեր ռեակցիա առաջացրեց: Եթե ռուսական կառավարությունից դժգոհ խոշոր ֆեոդալների մի մասը գնաց Ալեքսանդր արքայորդու ետևից, ապա հասարակական մյուս խավերը ջանում էին հարմարվել նոր իրադրությանը, և ոչ միայն նրա համար, որպեսզի պահպանեն վրացական թագավորների օրոք ունեցած իրենց առանձնաշնորհումներն ու արտոնությունները, այլև ձեռք բերեն իրավունքներ և արտոնություններ, որոնք հատուկ էին մետրոպոլիային:

Այսպես օրինակ, Ղազախի, Բորչալուի, Շամշադինի և մյուս շրջանների աղալարները ճգնում էին օժտել իրենց ճորտատիրական իրավունքներով և ճանաչել տալ դրանք, մինչդեռ նրանք բնավ նման իրավունքներ չէին ունեցել և հանդիսացել էին որպես սոսկ պետական պաշտոնյաներ, կառավարելով այս կամ այն շրջանն ու գյուղը և որպես պաշտոնավարձ ստանալով տվյալ վայրի եկամուտների համապատասխան մասը:

Բուրովին այլ դիրք էին գրավել մեզ հետաքրքրող մոքալաքները: Նրանք ոչ միայն չէին ուզում փոխել իրենց իրավիճակը, այլև ռուսական տիրապետության հաստատումից անմիջապես հետո հարց էին բարձրացնում, որպեսզի վրաց արքաներից նրանց շնորհված իրավունքները մնան անձեռնմխելի: Այդ հիշեցնում է Ռուսաստանի հայկական գաղթավայրերը, որոնք հենց հիշյալ ժամանակաշրջանում պայքար էին մղում ցարական կառավարության կողմից նրանց ունիֆիկացիայի ենթարկելու փորձերի դեմ:

Ինչպես արդեն նշեցինք, իր տիրապետության հենց սկզբից ցարական Ռուսաստանը փորձեց անցկացնել Վրաստանում կառավարման իր սկզբունքները: Սակայն հանդիպելով շատ խոշոնդոտների և դիմադրության, ցարական պաշտոնյաներն սկսեցին խորանալ նորանվաճ երկրի բարքերի ու կենցաղի մեջ, ծանոթանալ և ուսումնասիրել այն: Կազմվում էին զանազան հանձնաժողովներ՝ տարբեր խնդիրներ հետաքննելու համար: Այսպես, 1814 թ. ապրիլին կազմվում է մի հանձնաժողով, որը պետք է ուսումնասիրեր մոքալաքների դրությունը և պարզություն մտցնե՞ր դրա մեջ:

Դեռևս կառավարչապետ Կնորրինգի օրոք մոքալաքները հարց էին բարձրացրել վրաց թագավորների կողմից իրենց շնորհված արտոնությունները պահպանելու համար: 1804 թ. սկզբներին մոքալաքները նորից են հարց բարձրացնում, որպեսզի իրենց թույլ տրվի ընտրելու ներկայացուցիչներ քաղաքացիների ներքին գործերը կառավարելու համար: Նույն թվականի ապրիլի 12-ին տեղական ռուսական կառավարությունը ներկայացնում է 9 «ընտրյալ մոքալաքների» ցուցակ, որոնց ընտրել էին 100 մոքալաքներ: Այդ ցուցակում

25 Մատենադարան, Կաթողիկոսական դիվան, թղթ. 28, վավ. 158:

կային հետևյալ անձինք՝ Հովսեփ Քեթիուզով, Եսայի Փիթոյան, Հովսեփ Քարթվելիշվիլի, Դավիթ Կարթվելիշվիլի, Մկրտիչ Տեր-Ասատուրով, Աղա Շիրով, Աբել Շադինով, Ենոք Խախուտով և Շաքար Մադինով։ Սրանք ընտրվել էին մեկ տարի ժամանակով, միայն մախթա հավաքելու համար։

1809 թ. բարձրագույն հրամանի համաձայն, Թիֆլիսի առաջնակարգ մոքալաքները աղատվում էին մարմնական պատժից (Վախթանգ VI օրենսգրքի հիման վրա)։ Այս առիթով, հարց է ծագում, թե ով պետք է դասվեր առաջնակարգ մոքալաքների շարքը։ Դրա համար է, որ հավաքվում է 1814 թ. հանձնաժողովը՝ բաղկացած 10 հոգուց։ Դրանք էին՝ իշխան-ազնվականներ՝ Փալավանդովը, Դարչի Բեբուլյանը, Դմիտրի Օրբելիանին, Զուրաբ Մելիքովը և Շադուբաթովը, մոքալաքներ՝ Հովսեփ Թադոև, Եսայի Փիթոև, Մկրտում Մինթոև, Բեժան Բաստամով և Միքայել Սառաջև։

Հանձնաժողովը երկու տարի աշխատելուց հետո ներկայացնում է իր տվյալներն ու եզրակացությունները։ Պարզվում է, որ մինչև XIX դ. մոքալաքները դատվել են ըստ իրենց կարգային պատկանելության։ Մինչև Ռուսաստանին միանալը Վրաստանում եղել է 241 մոքալաքական ընտանիք, որոնցից 53-ը առաջին կարգի, 91-ը՝ 2-րդ կարգի, 97-ը՝ 3-րդ կարգի, և 4 ընտանիք էլ եկեղեցական մոքալաքներ։ Սակայն այս դասակարգման դեմ է դուրս գալիս հենց հանձնաժողովի անդամ Սառաջևը, առարկելով, որ ճիշտ չէ որոշված 1-ին կարգի մոքալաքների թիվը։ Նրա բողոքների հիման վրա 1817 թ. սեպտեմբերի 17-ին կրկին հանձնաժողով է հավաքվում, որը նոր ցուցակ է ներկայացնում, ըստ որի 1-ին կարգի մոքալաքական ընտանիքների քանակը ավելանում է 19-ով, իսկ եկեղեցական մոքալաքներին՝ չորսից դառնում է յոթ։ Բայց այս նոր ցուցակը չի ընդունվում ընդհանուր ժողովի կողմից, որը հրաման է տալիս ուժի մեջ թողնել 1816 թ. հուլիսի 31-ին կազմած ցուցակը. (այսինքն՝ առաջինը)։

Սակայն թե առաջին հանձնաժողովի կազմած ցուցակը, թե երկրորդ հանձնաժողովինը, ճանաչում չեն գտնում։ Կուսակալ Ա. Երմոլովը հանձնարարում է նոր հանձնաժողով կազմել Դարչի Բեհբուլյանի նախագահությամբ և հարցին վերջնական լուծում տալ։ 1818 թ. փետրվարի 20-ին հանձնաժողովը ներկայացնում է մի նոր ցուցակ, որտեղ 1-ին կարգի մոքալաքների ընտանիքների թիվը 49 էր, և որոնց հարստությունը 50000 ռուբլուց ավելի էր։ Բայց այս հանձնաժողովն էլ հարցը չի լուծում։ Մոքալաքների խնդիրը այդպես էլ մնում է առկախ ամբողջ մինչև 1860-ական շրջանը։

Ինչու էր ցարական կառավարությունը այդքան ուշադրություն դարձնում մոքալաքների վրա։

Ինչպես հայտնի է, դեռևս XVII դարի 2-րդ կեսից առևտուրը Արևելքի հետ Ռուսաստանի համար սկսում է կենսական նշանակություն ստանալ։ Վրաստանի միացմամբ լավագույն հնարավորություններն էին ստեղծվում Ռուսաստանի արևելյան առևտրի զարգացման համար։ Այդ իսկ պատճառով Վրաստանի առևտրական դասը, որ դեռ վաղուց անտի սերտ առևտրական կապեր էր հաստատել ինչպես Պարսկաստանի, այնպես էլ Թուրքիայի և մյուս արևելյան երկրների հետ, արժանանում է ռուսական կառավարության հատուկ ուշադրությանը, որպես արևելյան առևտրի հենակետերի և այն իրացնողի՝ կայսրության հարավում։

Երբ հարց է առաջանում վրաստանի առևտրականներին բաժանել գիլդիաների (ռուսական հիմունքներով), Կովկասի կուսակալ Ա. Երմոլովը դեմ է դուրս գալիս դրան: Ըր 1821 թ. մարտի 26-ի կառավարիչ Սենատին հղած ղեկուցադրում նա ասում է, որ ռուսական օրինակով գիլդիաների հաստատումը վրաստանում ոչ միայն փոքր ի շատե օգուտ չի բերի պետությանը, այլ, ընդհակառակը, կարող է խիստ վնասել առևտրի ընդարձակմանը և նեղել բնակիչներին, քանի որ հնուց ի վեր վրաստանի առևտրականներից ոչ մեկին արգելված չի եղել երբևէ գնալ արտասահման կամ էլ Ռուսաստանի քաղաքները իր առևտրական գործերով, և դրանից է, որ այժմ, չնայած ճանապարհային մեծ դժվարություններին, հնարավոր է կենսամթերքներ ձեռք բերել շափավոր գներով: Եթե արտասահմանյան և ռուսական առևտրի իրավունքը տրվի միայն առաջին և երկրորդ կարգի մոքալաքներին, դա նշանակում է՝ ամբողջ առևտուրը տալ խիստ փոքրաթիվ մարդկանց ձեռքը, որովհետև բոլոր առևտրականներից հազիվ թե երկուսից հինգ ընտանիք ի վիճակի լինի գրվելու առաջին կարգի մոքալաք: Դրա համար Երմոլովը առաջարկում է առևտուրը վրաստանում թողնել իր նախկին հիմքերի վրա: Բայց նա անհրաժեշտ է համարում մի այլ բան. որ հարկավոր է խրախուսել շատ մոքալաքների դառնալու առաջին կամ երկրորդ կարգի: Այդ իսկ պատճառով, անհրաժեշտ է Թիֆլիսի և վրաստանի այլ վայրերի առևտրականներին բաժանել չորս աստիճանի: Միայն Թիֆլիսում, քանի որ մյուս քաղաքներում առևտուրն այնքան էլ զարգացած չէ և մոքալաքներ էլ չկան, հիմնադրել քաղաքային դոմա: Ով ցանկություն կհայտնի գրվելու մոքալաք (թեկուզ ընտանյոք հանդերձ) պետք է դիմի դոմային: Վերջինս պետք է թույլատրի, որ յուրաքանչյուր կարգի համար դիմող մոքալաք վճարի դոմային համապատասխան գումար, ինչպես օրինակ, առաջին կարգի համար՝ 200 ռուբլի, երկրորդ կարգի համար՝ 100 ռ., երրորդի համար՝ 25 ռ., իսկ չորրորդ կարգի մոքալաքներից յուրաքանչյուր տղամարդ տարեկան պետք է վճարեր 1 ռ. 50 կ.:

Այս կերպ գրանցված մոքալաքներին շնորհել հետևյալ արտոնությունները՝ առաջին կարգի մոքալաքներին տալ բացարձակ իրավունք հիմնադրելու գործարաններ ու ֆաբրիկաներ, երկրորդ կարգի մոքալաքներին թույլ տալ զբաղվել կապալառությամբ, երրորդ կարգի մոքալաքներին իրավունք տալ զբաղվելու առևտրով, ինչպես առաջին երկուսին, և վրաստանում, և Ռուսաստանում, և արտասահմանում: Բացի այդ, թույլ տալ նրանց կրելու զինվորական նսարավաճառների պարտականությունները: Հանցագործության դեպքում դատել նրանց ոչ արտոնվածների պես, չազատել մարմնական պատժից: Իսկ 4-րդ կարգի մոքալաքներին թույլ տալ զբաղվել առևտրով և տնայնագործությամբ միայն վրաստանում, և ոչ մի այլ արտոնություն: Բոլոր այն մոքալաքներին, որոնք վճարում են 4000 ռուբ. մախթա, եթե որոշակի ժամկետում ցանկություն չհայտնեն զրանցվելու որևէ կարգի մեջ, հարկադրել չորրորդ կարգի համար նախատեսվածով, և մախթան վերացնել: Իսկ ոչ մի կարգի մոքալաք չգրանցված մարդկանց թույլ չտալ զբաղվել առևտրով, բացի իշխաններից և ազնվականներից, որոնք եթե ցանկություն հայտնեն առևտրով զբաղվելու, ապա նրանց գրանցել միայն որպես առաջին կամ երկրորդ կարգի մոքալաքներ²⁶:

²⁶ «Акты...», т. XI, стр. 687.

Թեպետ Ս. Երմոլովի այս առաջարկությունները, ըստ որոնց ապահովվում էր լայնատարած և շահավետ առևտուր հայերի միջոցով, օրենքի ուժ չեն ստանում, այնուամենայնիվ մասնավոր կիրառում են գտնում: Հենց Երմոլովի ժամանակ մոքալաք Սառաջևը հիմնում է խոշոր կաշեգործարան²⁷:

1826—1829 թթ. ռուս-պարսկական և ռուս-թուրքական պատերազմների ժամանակաշրջանում շատ մոքալաքներ սկսում են զբաղվել կապալառությամբ: Ռուսական զորահրամանատարությունը նրանց էր հանձնում աճուրդով թե զորքերին մթերք մատակարարելը, և թե տնտեսական այլ պահանջներ: Ինչպես գրում է Ա. Երիցյանը «հայ փողրաթիւնները շատ նշանավոր ծառայություններ մատուցեցին ռուսական զորքին ու ոմանք պատվանշաններով պարգևատրվեցան»²⁸:

Մինչ այդ էլ էր ռուսական կառավարությունը դանազան պարգևներ շնորհում մոքալաքներին՝ նրանց դեպի կայսրությունը ունեցած լավ վերաբերմունքի և օգնության համար: 1813 թ. գեներալ Ռտիշչևը միջնորդում է, ի թիվս այլոց, Թիֆլիսի հայտնի մոքալաք Դավիթ Սառաջևին նահանգական քարտուղարի աստիճան տալ, նկատի ունենալով նրա խոշոր ծառայությունները ռուսներին: Սառաջևն առաջինն էր, որ առևտրական ուղի հարթեց Մոսկվայից Թիֆլիս կովկասյան դժվարանցանքների լեռների վրայով, և նրա օրինակին հետևեցին շատերը: Վրաստանում պարենի, հատկապես հացի սակավության ժամանակ նա կարողանում է ձեռք բերել փթերով հաց, որով մեծապես օգնում է կառավարությանը կասեցնելու ժողովրդի դժգոհությունը: Թիֆլիսում հաճախ մոլեզնոդ համաճարակներից բնակիչներին փրկելու համար, Սառաջևը իր սեփական միջոցներով կառուցում է հիվանդանոց և այլն²⁹:

Նման օրինակներ կարելի է շատ բերել: Սակայն ներկա հոդվածի շրջանակները մեզ այդ հնարավորությունը չեն տալիս: Ուստի ամփոփենք:

1. Մոքալաքների խավը ֆեոդալական Վրաստանի պայմաններում առաջացած մի առանձնահատուկ երևույթ էր, որը, որոշ լիմաստով, հանդիսանում էր կապիտալիստական հասարակարգի սաղմերի կրողը: Ազատ ավատական կապանքներից և վայելելով խոշոր ֆեոդալների կենտրոնախույս ձգտումների դեմ պայքարող և կենտրոնացված ուժեղ իշխանություն ստեղծել ցանկացող վրաց արքաների հովանավորությունը և օրենքի պաշտպանությունը մոքալաքների խավը խոշոր դեր էր խաղում Վրաստանի ներքին և արտաքին առևտրի, ինչպես նաև արդյունագործության զարգացման մեջ: Վրաստանի Ռուսաստանին միանալուց հետո էլ, մոքալաքները շարունակում էին մեծ դեր խաղալ երկրի տնտեսական կյանքում: Ռուսական տեղական իշխանությունների հովանավորողական քաղաքականությունը առևտրի զարգացման համար ընդառաջ գնաց մոքալաքների տնտեսական շահերին և հնարավորություններ է տեղծեց նրանց համար առևտրական գործունեության ոլորտից անցնելու արդյունաբերական ոլորտը, այդպիսով հանդիսանալով կապիտալիստական հարաբերությունների զարգացման առաջամարտիկները Վրաստանում:

2. Այստեղ պետք է ասել, որ մոքալաքների ինստիտուտի բազայի վրա վեր հառնելով նորելուկ հայ կապիտալիստները, շնորհիվ իրենց կապիտալիստ-

27 Ю. Ф. Ахвердов, Тифлиские амкары, Тифлис, 1883, стр. 18.

28 Ա. Երիցյան, Ամենայն հայոց կաթողիկոսությունը և Կովկասի հայք XIX դարում: Մասն Ա, Թիֆլիս, 1894, էջ 443—444.

29 Архив внешней политики России, ф. «Гл. арх. 1—18», д. 7, л. 17 об.

րի, նսեմացնում էին վրաց ազնվականների փքուն սնապարժությունը: Այս հանգամանքը ծնունդ էր տալու հայ և վրացի վերնախավերի ազգային հակամարտությանը XIX դարի երկրորդ կեսին:

3. Մոթալաքների ինստիտուտի գոյությունը ինքնին վկայում է հայերի և վրացիների տնտեսական ու քաղաքական սերտ կապերի առկայությունը և հանդիսանում է դրանց իսկ արտահայտությունը: Իրավական ուժ տալով մոթալաքների արտոնություններին, որոշ իմաստով հավասարեցնելով նրանց վրաց ազնվականներին՝ Վախթանգ VI ելնում էր իր երկրի տնտեսական ու քաղաքական շահերից:

А. А. ПЕТРОСЯН

ЗНАЧЕНИЕ МОКАЛАКЕ В АРМЯНО-ГРУЗИНСКИХ ПОЛИТИЧЕСКИХ И ЭКОНОМИЧЕСКИХ ОТНОШЕНИЯХ

Р е з ю м е

В статье рассматривается вопрос о возникновении нового привилегированного слоя городского населения Грузии — мокалаке. Мокалаке формируются еще в XVII в. в основном из переселившихся из Армении и поселившихся в Тбилиси и Гори армян, которые составили значительную часть городского населения.

Первоначально мокалаками назывались все горожане, но впоследствии название это становится каким-то почетным званием, которое присуждалось людям, наделенным привилегиями и правами, дарованными грузинскими царями. Звание мокалаке имели право носить те, которые были коренными горожанами и платили особую подать — махту. Мокалаке, которые являлись в основном ремесленниками и купцами, играли большую роль в производственной и торговой жизни Грузии и составляли основную массу горожан—налогоплательщиков.

Политика наделения мокалаке привилегиями преследовала цель не только экономического усиления городов, но и еще большего привлечения армян-купцов в Грузию. Это свидетельствует о стремлении правящих кругов укрепить контакт между армянами и грузинами для развития экономической жизни страны.